




痘疹心錄

五一



痘疹傳心錄卷之五

國朝文獻

西吳朱惠明

著

發熱口訣

初發悠悠身熱氣息和平飲食如昔二便清調寤寐
安寧則痘來順候面色青而眇白精神少而倦怠再
見便溏哕乳此症斷作虛看二便秘而喘脹煩躁睡
卧無寧若還譫語狂言斯候均爲內熱故毒盛身如
炎火毒微則肌體清涼邪火上逆嘔吐毒熱下注瀉
溏心熱盛而驚搐胃熱實而顛狂邪侮于金啼聲不
出而嘎嘎毒伏于腎腰背痛極而惶惶內症固重而

外症猶烈毒遏不舒須防失血是故熱盛者只宜清涼發散不宜峻用苦寒發散則毒得外出而熱自解苦寒則毒反冰伏而出愈難故發散之劑輕則加升葛以疎其熱而煩躁壯熱者非此何以定其標重則有麻黃以開其壅而喘急腹脹者非此何以救其危未萌先瀉有熱症莫作虛看無熱症便爲虛論止熱瀉以清涼更兼發散治虛澹以溫補仍用開提是以內虛悞用寒涼不惟助伊作瀉實熱如投補劑只恐轉增煩劇安靜而能食勿謂便實而可下泄瀉而煩渴莫言熱症以投涼氣弱少食者不任其毒神強能

食者不失其常

熱因

或問曰痘必熱而後發者何與曰天地之育萬物雖賴土以生息而土不得陽氣薰蒸於下安能發育中拆乎如豆初出分人身一小天地也痘之管紐在脾脾屬中土若非火蒸透膈則痘毒安能振拔於上而發泄腎之梟鬱也哉岐伯曰五穀不遇熱不結痘疹不熱透不徹痘既見形全視乎熱之淺深痘出熱退者痘本必疎痘出而熱不少減者痘出必密故患痘者固不可不熱而其熱亦不可過甚也

一聞人氏曰痘疹之熱慎不可作熱治大熱當利小便小熱當解毒也

一天行痘疹之時凡小兒身熱嘔惡腹脹者宜防出痘不可以峻藥表下之體審的爲內傷或外感分症而兼治可也果因痘毒欲出而然者若誤以表藥下藥投之寧免實實虛虛之謂乎。一兒因傷食醫以峻藥利之不已致痘伏陷不出余謂元氣下陷以小異攻散加升麻川芎蟬脫治之愈亦有不應藥者伏陷喘脹而斃。一兒初熱嘔吐腹脹醫誤爲內傷以換積丸利下傷脾痘雖漿足脾虛溏泄不能收斂而

卒

發熱宜辨

痘疹發熱非止一端有因外感而熱者有因內傷而熱者有因氣血虛而熱者有因毒火行而正熱者然其症雖同而其原則異不可不審也請試言之若頭疼眼痛鼻乾耳聾身體拘急脇痛惡寒惡風人迎脉大于氣口手背熱或手足逆冷咳嗽痰涎鼻塞聲重而發熱者此因外感而熱也○若惡食不食唇紅胃膈飽悶腹臃脹噯氣吞酸泄瀉氣口脉大于人迎手心熱腹中作鳴轉氣便黃穢臭而發熱者此因內傷

而熱也。○若氣短不續，面色眇白，四肢無力，腰背酸疼，寒熱往來，口不知味，人事如常，午後熱甚，脉弱無力，忽忽不爲運動而發熱者，此因氣血虛而熱也。○若呵欠悶瞀時發驚悸，乍涼乍熱，手足時冷，面頰赤，目淚汪汪，噴嚏昏睡，嘔噦搐搦，耳聾俱冷耳後有紅絲赤縷而熱者，蓋手少陽三焦之脉上缺盆循耳後而入耳中紅絲者火之色也以此四因若見一症，便宜詳審，不必悉具。若外感先宜解散，內傷消食，和脾若氣血虛，宜兼補養，惟其正熱不可妄治，待痘一出，則熱自微矣。如其熱過極，又在微解散之以撤其盛，若正熱

而悞認外感過投以解散之劑則表之陽氣虛不惟痘不能生長而後且痒塌之患生焉若正熱而悞認內傷過投以消導之劑則痘之陰血虧弱不惟痘不能灌漿而且倒陷之禍立至矣故臨病之際最宜詳明不可造次若認症一差兩咎立見或有稍疑不如靜守爲醫者宜慎之而毋忽焉

一或問發熱作渴者何曰皆由毒氣萃於陽明銷爍

津液

火炎則水涸也

故口渴也宜升麻葛根湯主之又以紅

花牛旁子湯服之毒得外透其渴自止也

一凡痘瘡非熱不出故治不可盡除其熱若微熱不

渴大小便清調此肌表之熱非裏熱也表裏無邪不可妄治若身熱如火痘勢稠密其毒必盛宜解毒兼利小便以升麻葛根湯加連翹桔梗牛旁子木通燈心淡竹葉治之也

一發熱之初或吐或瀉者皆由毒盛而奔越也不可止瀉之宜透肌解毒之劑毒得外出則吐瀉自止矣若久不止者脾胃弱也治宜五味異攻散加升麻川芎蟬脫之類亦有傷食吐瀉不可不辨

一發熱時宜用紅紙捻飽蘸麻油點火照週身若皮肉裏有鮮紅成片者凶也

一發熱自汗若表受寒邪而汗者乃邪從汗散無害
不可過投表散之劑若表虛而自汗者當以參芪實
表而兼升透之劑也

一發熱而腹痛者

方見前
腹痛門

一發熱而增寒壯熱者乃風邪在表宜升麻葛根湯
加防風蟬蛻白芷治之或痘毒留連於腠理欲出不
出亦能發寒熱也

一發熱身肢骨節俱痛者乃肌表所感六淫之邪不
散故痛也宜羌活湯治之或有痘毒攻發不透亦能
作痛也經曰諸寒爲痛痛在筋骨

附治驗

一兒發熱時衄血不止余謂諸瘡皆屬心火心主血
血熱上冲于肺迫血上行而爲衄也經曰邪從衄解
無害又曰火鬱則發之以升麻葛根湯加荊芥牛旁
子治之痘透衄止愈

一發熱小便黃赤短澀者乃熱毒少透滲入膀胱故
溺赤也治宜升麻葛根湯加川芎桔梗木通燈心以
發泄其毒而小便清利矣

一小兒熱盛腹脹喘急便秘狂煩痘點不見余視爲
風寒壅遏腠理堅閉以葛根湯加麻黃桔梗蟬蛻少

時汗下如雨邪從汗散痘出豁然喘定神清愈

一小兒發熱徧身見點如蚊迹咸論蚊迹蚤斑刻期而爲鬼錄無治法召余視之非正痘也乃熱毒爲風寒所遏故見點如蚊咬與傷寒發癰者同以芎蘇散主之得微汗點散而愈又一兒見症如前余治之點退而復出正痘業擅者不可不辨

一兒初發熱及見點時兩目倏然紅腫余視謂風熱上攻以芎蘇散加蟬蛻荆防治之愈

一兒猝然驚搐而仆不時而甦復又如余視曰痘症也因客受風寒腠理壅閉致毒滯于心而不得透

出以紅綿散治之痘毒一透其症自平治之而愈

一兒初熱如驚風發搐不審出痘以驚藥治之不愈將氣絕之際隱隱痘出召余視謂驚搐者毒自心經而出也蓋心竅一寒則毒氣閉伏况心主一身之血心寒則氣血凝滯痘欲出而不可得今已不及矣不治因感而錄之果卒

一兒初發熱搐搦竄視余謂痘欲出而驚搐也以升麻葛根湯加天麻鈎藤蟬蛻木通枳殼治之痘出症平余謂順症不藥而愈

一兒身熱譫語喘脹搐搦尋視腰背一二點蚊迹謂

曰此悶痘症也強以升發藥雖見數點俱紫黑色乃不治之症也

一兒初發熱腰痛如折不能坐立余謂折腰痘也乃腎虛韞毒不透強以荆防散鬱湯發出點如蚤斑口鼻出血而逝

一兒身熱便徧身作痒余謂客胃風寒封閉腠裏而痘毒不能卽出津液不爲作汗而解故痒也與傷寒汗不出而身痒者同論治以升麻葛根湯加蟬蛻川芎治之痘見而愈

一兒初發熱時惡寒身振振搖動余謂氣血俱虛不

能逼邪快出毒凝經絡之中欲出不出邪正交爭故振振也以升麻葛根湯加人參川山甲桂枝防風治之痘出症平又補中益氣湯調理愈

一發熱妄有所見譫語昏睡者此毒邪犯心心爲熱冒其神浮越而然也宜葛根湯導赤散加木通山查蟬蛻主之其痘豁然而人事清爽神彩復舊者吉若連綿不止魂魄將離

肝藏魂主血肺藏魄主氣血者也

安可治

哉

一兒發熱時而咬牙竄視余謂心經熱甚以升麻葛根湯合導赤散治之愈○又一兒發熱時咬牙悶瞤

余謂肝經風熱以羌活湯加葛根赤芍治之愈

一兒發熱時而汗大出不止余謂兒原表虛而用表散之劑則陽氣暴泄衛氣愈弱乃虛其虛也宜實表之劑以用過蒲扇燒灰酒下二錢又補中益氣湯治之愈

一兒發熱痘隱隱不透壯熱譫語喘脹便秘余謂夾食傷寒而發經曰急者先治以葛根湯加麻黃汗之又大柴胡湯利之前症悉平痘齊出又補中益氣湯保元湯調理愈

一兒壯熱發狂謂熱毒壅窒痘不能透以升麻葛根

湯加麻黃服之一身臭汗痘卽隨出其狂自止

痘疹傳心錄卷之五終